

李衛公會昌一品集別集外集三
補遺



李衛公會昌一品集

遺補 集外 集別

(三)

李德裕撰

李衛公會昌一品集卷十九

謝宣示噶沒斯等冠帶訖圖狀

伏以漢宣帝時呼韓單于來朝京邑。然待以客禮。未備漢儀。至後漢建武二十六年。單于慕先人之義。歸心中國。光武修祖宗之業。柔服北邊。因其稱藩。始加冠帶。厥後縣歷五代。僅及千年。惟聞征伐之勤。莫都來廷之盛。伏惟陛下功高漢后。威服窮荒。不勞六月之師。坐俟七旬之格。故得噶沒斯誓心向闕。稽首歸忠。自獻刑馬之書。仍酌留犂之酒。永勵臣節。以保塞垣。今則榮以黼纓。解其衣裘。簪笏就列。威儀可觀。推勁悍之心。豈勞戴鷩服禮義之化。甯比冠鷩鑒於丹青。益表神化。臣等謬參樞近。獲覩成功。歡忭之心。倍萬常品。

謝恩賜王元達與臣贊皇縣圖又三祖碑文狀

高品楊文端至。奉宣聖旨。賜臣前件圖等。伏以桑梓雖存。久隔兵戈之地。松楸浸遠。已絕霜露之思。運屬承明。時逢開泰。戎臣效順。寰海大同。故國山河。因丹青而盡見。祖宗基構。尋碑版而可知。祇戴天慈。載深感泣。不任荷恩榮惕之至。

謝恩令進異域歸忠傳兩卷序中改云奉敕撰狀

奉宣卿所進異域歸忠傳兩卷。宜寫賜噶沒斯。序中仍云奉敕撰者。臣才識淺近。學藝空虛。輕蹟宸嚴。方

懷兢惕。豈望聖慈宏貸。特假寵光。頒賜歸國之功。仍榮奉敕之字。草木承雨露之澤。皆被鮮輝。煙霞照日月之光。盡成綵繡。顧臣瓌陋。獲奉殊恩。竹帛垂榮。傳於不朽。不任荷恩感戴之至。今既奉敕撰序。與臣自進不同。序中已改兩處訖。謹同封進上。如允聖意。伏望宣付中書門下。

謝宣示進黠戛斯朝貢圖深愜於懷狀

今日款義行深至。奉宣聖旨。卿所進圖傳深愜於懷者。伏以陛下大化神明。百蠻震疊。故遠夷慕義。萬里來朝。誠宜圖以丹青。錄於編簡。傳之千古。以燁威靈。臣學術空虛。文藝淺薄。輒爲傳序。莫究聖功。陛下遽納微誠。特賜宣示。寵渥所及。搢紳爲榮。不任荷恩感戴之至。

謝贈故蕃維州城副使悉怛謀官狀

伏以遠夷率服。大國綏懷。一失良圖。千古不復。悉怛謀仰天歸命。空壁求降。據其款誠。已絕羌戎之望。執之爲戮。實傷義士之心。受降之時。臣與其盟。詎力不能救。心實懷慚。運屬聖明。合申幽枉。輒敢論奏。豈望聽從。陛下用周文之心。已同葬骨。念汧城之枉。仍賜策書。臣忝補鈞衡。嘗居戎帥。仰感元造。倍百羣情。臣不任荷恩感戴之至。

謝所進瑞橘賦宣付史館狀

高品劉傳奉宣聖旨。賜臣批示。以臣所請。宣示史館。特賜允從者。伏以橘性不遷。楚詞所載。聖情封植。禁籞結根。此六合同風九州共貫之應也。元宗朝種柑結實。亦是乘太平之休氣。道德之仁風。事協祖宗。實

光簡冊。臣目觀佳瑞。慚無潤色之工。心感元猷。莫盡揄揚之美。豈謂天慈曲被。特允微衷。擊壤庸音。獲知於皇鑒。雕蟲薄技。謬列於青編。千古光榮。百生何幸。不任感恩踴躍之至。謹奉狀陳謝以聞。

謝賜讓官批答狀

高品馮至珣至。奉宣聖旨。并賜臣批答。以臣昨所陳請。未賜允從者。蜉蝣淺命。未報君恩。犬馬微誠。敢忘臣節。迫以服藥。瞑眩抱疾。沈羸心力。衰殘形氣。減耗承訐。俞之命。或慮闕遺。奉密勿之機。實憂不逮。輒陳誠款。冀或聽從。陛下特降綸言。再加褒飾。德音撫慰。自合忘生。睿獎至深。豈敢言病。謹當策勵疲蹇。上副天慈。竭盡肝肺。以修官業。不任荷恩感戴之至。

謝恩不許讓官表狀

今日行深紹宗奉宣聖旨。卿太尉官。自朕意與。不是他門僥求而得。不要更引故事辭讓者。臣跪受聖旨。惶灼無地。臣昨者以位高疾仆。器滿忌傾。實懷瞰室之憂。敢喜在閭之賀。輒陳微懇。退積慚惶。陛下察臣孤立事君。寵拔皆由於睿鑒。一心守道。進取不近於回邪。勉以至公。絕其辭讓。臣敢不祇奉明詔。克勵貞規。慕孔父益恭之誠。遵叔敖愈卑之志。豈比罪無所禱。孫賈黜於聖人。久不自安。崔烈詢於厥子。仰思宸睠。倍積光榮。不任荷恩感激之至。謹奉狀陳謝以聞。

謝恩不許讓官表狀原注。兵罷後上表。

行深紹宗奉宣聖旨。豈政理有失。風俗有乖。何遽退辭。一二年分憂。不用進表者。伏以自古臣得其君。最

爲難遇。非龍顏英主。良平無以效其謀。非日角聖姿。寇鄧莫能申其志。則知致理不由於臣力。成功皆系於上心。伏以陛下明過高光。德侔天地。常制勝於千里之外。動合機先。不取材於三傑之臣。皆躋慮表。故能征伐必克。擒縱無遺。臣謬忝鈞衡。親稟宸算。竟微獲免之效。內展指蹤。又無汗馬之勞。外施武力。每奉聖詔。屢獎丹誠。夙夜自思。冰炭交集。况今四表無事。六氣斯和。簫勺可致於治平。文軌盡同於元化。時雨旣降。浸灌何施。鴻明照臨。燭火宜息。昨者輒陳誠懇。上黷宸嚴。所冀守介石之誠。或能回日。甯敢慕揮金之樂。取適當年。陛下至德矜愚。深慈宥過。寬其罪戾。重降恩私。惟願盡螻蟻之生。勉自陳力。豈復顧蜉蝣之命。更徇微衷。上戴皇明。尤增覲懼。臣不任荷恩感激之至。

謝恩加特進階改封衛國公狀

奉今月二十七日敕。臣封衛國公者。仰戴天慈。獲遂私懇。以感以泣。榮惕載深。伏以支庶嗣侯。雖存故事。元成以兄有譴。乃紹扶陽之封。耿霸以父屬愛。遂繼牟平之爵。開元中。蘇頌特封許國公。亦無襲字。然地居嫡長。受則無嫌。伏思亡父先臣。開國全趙。亡兄已經繼襲。未得傳孫。臣每念貽謀。豈宜不正。若苟安殊寵。實愧幽明。輒罄愚衷。果蒙聽察。况衛國疆畛。密邇叢臺。先祖之所成名。由茲光大。微孫得以啓土。實謂至榮。祇奉寵章。益慚非據。臣不任荷恩感戴之至。

謝恩加特進階狀

伏奉今月十二日制書。授臣散官特進者。伏以漢氏之制。勳望優隆。則位加特進。服以文冕。列侍清祠。榮

亞三台品居第二。自非學深張禹。功重竇融。則何以膺是寵章。允茲瞻望。臣器本凡薄。才在下中。遭逢聖明。謬忝樞務。近者展采清廟。祇事圓丘。獲親日月之光。已驚殊寵。又沐雲霄之澤。更荷新恩。雖臣隕身。豈能上報。惟冀飲冰效節。介石存誠。居若對於神明。動罔愆於風雨。保其一志。少答鴻私。臣不任荷恩惕懼之至。

會昌五年十二月三日宰相對後就宅宣示謝恩不許讓官表狀

今日奉宣。縱累陳情。終不允遂者。臣在苒六年。徒竭丹款。竟無一善。稍補皇猷。視冒難居。屢祈退免。面請則每慮煩黷。口陳則莫盡肺肝。頻以懇誠。託於同列。因臣不對。得爲上聞。豈意天慈矜愚。聖德念舊。尙取涓塵之效。未徵尸素之尤。累降近臣。再宣聖旨。實恐罄蟬蛸之命。無以報天。所冀盡犬馬之心。惟知戀主仰戴皇澤。倍切微衷。不任荷恩兢惕之至。

謝賜錦綵銀器狀

中使田獻鐸至。奉宣聖旨。賜臣前件錦綵銀器等。臣伏聞虞舜舞干。而苗人來格。周穆徂征。而荒服不至。卽知王者之功。莫大於耀德戢兵。安人柔遠。伏以陛下聖德廣運。神武照臨。息雷霆之威。而蠻夷自服。宏天地之德。而邊鄙乂安。臣願以鴻猷播於蕃帥。因綴古今之事。庶堅忠義之心。豈意慈容。厚加寵錫。班行聳聽。里閭生光。非止闔門之榮。實增後代之價。仰慚恩覆。倍積兢惶。臣不任忭忭感戴之至。

謝恩賜錦綵銀器狀

高品劉行宣至。奉宣聖旨。以臣撰真容讚。特賜前件錦綵銀器等。臣學非稽古。文不逮人。徒以運遇聖明。識叨宰弼。宸心向屬。榮寵荐加。得以淺陋之詞。上述鴻明之德。敍帝堯之奇表。非可強名。讚軒后之英威。空慚竭思。豈謂皇慈曲被。厚錫俄霑。錦綵窮華麗之文。器物呈雕鏤之妙。跪受榮感。報效無階。臣不任忻荷感恩之至。

會昌五年六月二十九日就宅宣并謝恩問疾表狀

高品略遂泰至。奉宣聖旨者。臣承命兢皇。不知所處。臣緣抱疾歲久。服藥過多。形體虛羸。筋力不逮。實恐妨廢機務。轉積愆尤。所以輒獻懇誠。願辭繁劇。每於延英奏事。陛下常假慈顏。心肺肝懷。無所不盡。更無他故。須有上陳。只以衰羸。自憂顛仆。况臣四海之內。孤獨一身。惟將赤誠。仰戴明主。豈敢輒懷願望。上負天慈。伏望更許兩日將息。卽冀朝謁。臣不任云云。

謝恩問疾狀

高品王克諫至。奉宣聖旨。卿小有違裕。昨日於延英面奏。乞假將息。實疚余懷。宜善頤養。常就痊平。所要內庫食物及藥物。無致嫌疑。但具數奏來。卽今宣賜者。臣緣常服冷藥。十五餘年。屬蒲柳年侵。衰憊日甚。風毒腳氣。往往上衝。頃刻之間。心腹悶痛。飯食至少。筋力漸羸。所以冒昧上陳。請三數日在家將息。陛下恩深覆育。軫父母唯疾之憂。德過生成。念犬馬至微之命。恤問稠疊。沈痼頓痊。臣食物未得。更無所闕。天慈下降。感極涕零。臣不任感恩兢惕之至。

李衛公會昌一品集卷二十

武宗改名告天地文

臣續承丕緒。勵翼七年。不敢怠荒。以思無逸。北制強虜。東翦叛徒。享此鴻名。實由元造。嘗欲述帝堯之典。欽若昊天。修周武之法。建用皇極。成於王道。以黜異端。釋氏之教。興於戎狄。悖君臣之禮。廢父子之親。耗蠹蒸人。殫竭物命。宜尼垂訓。不語怪神。因而漸除。咸一於正。襲前聖之業。燦而光明。臣之本心。諒在於此。伏以書載五行。常彼水土。名有五義。不以山川。後之稱名。稍違古典。今則循漢宣之故事。稟皇祖之貽謀。採用離明。以符一德。又臣近因微恙。已及二時。感此陽和。物皆暢茂。未逢勿藥之喜。獨有向隅之憂。如臣政教不明。宜有陰譴。刑罰不中。未合天心。伏願舍臣咎愆。許臣改悔。永保宗廟。以安邦家。所疾日瘳。平復如舊。五星度理。百福來臻。敢不克己。厲精祗事上帝。洗心齋戒。嚴奉神祇。懇陳至誠。仰望照鑒。

祈祭西嶽文

惟神作鎮中土。據於西陲。積高炳靈。宅神明之奧。少陰協德。成天地之功。恭聞烈祖元宗。御歷永年。祭必受福。秘臚昭饗。金刻猶存。近者陰澤稍愆。宿種未茂。精意纔達。甘液驟零。旣紓播種之勤。已獲流根之潤。今因報德。再竭至誠。某續奉丕圖。勤勞七載。恭己思道。豈敢怠荒。屬黜虜南侵。震驚朔野。兵烽一舉。羣幕皆焚。路子嬰兒。梟首魏闕。參墟叛將。面縛壘門。成此武功。無非幽贊。又以釋氏之教。出於西夷。棄五常之

典絕三綱之常。殫竭財力。耗蠹生人。黜其異端。以正王度。庶可復古。諒非近名。屬以忽於所慎。寒暑成疾。曠時且乖於勿藥。昧旦徒切於求衣。如某政教不明。宜有陰譴。刑罰不中。未合天心。實希明神。許其改悔。永保宗廟。以安邦家。所疾日瘳。平復如舊。昔成湯自咎者六。霖雨消災。宋景善言者三。法星退舍。至誠所感。前史昭然。誠信不欺。特神正直。敢不誓於丹腑。嚴奉明靈。敬陳忠懇。伏望臨一作靈鑒。

賀廢毀諸寺德音表

臣某等伏奉今日制。拆寺蘭若。共四萬六千六百餘所。還俗僧尼并奴婢爲兩稅戶。共約四十一萬餘人。得良田約數千頃。其僧尼令隸主。客戶大秦穆護襖二十餘人。並令還俗者。臣聞仲尼祖述堯舜。憲章文武。大宏聖道。以黜異端。末季以來。斯道久廢。不遇大聖。孰能拯之。臣某等中謝。伏以三王之前。皆垂拱而理。不可得而言也。厥後周美成康。漢稱文景。至化深厚。大道和平。人自稟於孝慈。俗必臻於仁壽。豈嘗有外夷之教。玷中夏之風。東漢楚王英始盛桑門之饌。淪於左道。桓帝更增犀蓋之飾。歸於亂政。魏之三祖。西晉太康。雖君非大聖。臣非上哲。然猶祖尙老莊。斯教未行。至東晉因吳人之佻薄。襲孫權之弊政。始建塔廟。乃譯梵書。宋齊梁陳。其教浸盛。好大不經之說。陋乃詩書。因報拔濟之談。隆於仁孝。運祚浮促。篡奪相尋。二百年間。五變朝市。君無殷宗之福。臣靡衛武之年。感驗寂寥。斯可明矣。高祖神堯皇帝。方欲剷除斯弊。掃刷中區。時屬宰臣蕭瑀。本梁氏之子孫。尋覆車之軌轍。廢格明詔。以迄於今。遂使土木興妖。山林增構。一巖之秀。必極雕鐫。一川之腴。已布高剝。鬼功不可。人力甯堪。耗蠹生靈。侵減正稅。國家大蠹。千有

餘年。伏惟仁聖文武章天成功神德明道大孝皇帝陛下。明紹於天。粹合於道。黜霸圖而功盛。入聖學而德優。常欲天下之動。咸貞於一。以一言之蔽。思必無邪。先定宸心。獨發英斷。破逃亡之藪。皆列齊人。收高壤之田。盡歸王稅。正羣生之大惑。返六合之澆風。出前聖之謨。爲後王之法。巍巍功德。煥炳圖書。臣竊位樞衡。莫能裨益。愧無將明之效。徒懷鼓舞之心。千古未逢。百生何幸。不任忭賀踴躍之至。謹奉表陳賀以聞。

瑞橘賦并序

清霜始降。上命中使。賜宰臣等朱橘各三枚。蓋靈囿之所植也。臣伏以度淮而枳。由地氣而不遷。吹谷生黍。信陽和之所感。昔漢武致石榴於異國。靈根遐布。此西域柔服之應也。魏武植朱橘於銅雀。華實莫就。乃吳人未格之兆也。考於前史。昭晰可知。豈非天地和同。靈物效祉。去蠻夷之陋。獲近太陽。感王化之盛。更承膏露。草木尙爾。况乎人心。漢宣帝宮館山澤。意有所感。必詔近臣賦之。臣幼學爲文。忝列樞近。敢稽首獻賦曰。

美南州之嘉樹。受烈氣於炎德。固一志於殊方。遂不遷於上國。貞葉一作枝。凝碧一作蔦。湘岸之夕陰。華實變黃。動江潭之秋色。雜丹楓於溪畔。映綠篠於巖側。翡翠以之列巢。鸕雛於焉棲息。雖同霑於雨露。竊自得於彫飾。終獲譽於皇明。豈因人而羽翼。感洪鈞之獨運。幹造化之元力。思六合之同風。採孤根而移植。播元氣之茂育。諒英靈之不測。逮乎霜飛文囿。風落秦川。金莖炫燿於朝日。玉樹青葱於霽天。峨方

壺之翠島。列靈沼之清漣。上鬱松檉。下秀蓀荃。艷朱草與屈軼。華靈芝與賓連。靈卉畢植。而嘉橘在焉。冰心獨潤。金衣更鮮。天漢之華星。焜燿閭闔。風之珠樹。粲然香若。罔於野露。色疑炫於江煙。旣而大官獻新。奇果列筵。非厥包之自遠。何菲陋之莫傳。樹隱方塘。比丹萍之初實。盤映皎月。與赤瑛而共妍。東鄙孤臣。謬陳三事。旣乏和羹之用。獨需可口之味。并食不割。竊愧晏嬰之知。捧之以拜。重感桓榮之賜。庶不改於雪霜。永酬恩於天地。

奉和聖製南郊禮畢詩

聲筦歌大呂。冕裘旅天神。燒蕭闢閭闔。祈穀爲蒸人。羽旗灑輕雪。麥隴含陽春。昌運歲一作感。今會王猷從此新。三臣皆就日。萬國望如雲。仁壽信非遠。羣生方在鈞。

郊壇回輿中書二相公蒙聖慈召至御馬前仰感恩遇輒書是詩兼呈二相公

七萃和鑾動。三條葆吹回。相星環一作還。日道蒼一作臣。馬近龍媒。原注。古詞臣歌馬蒼。咫尺天顏接。光華喜氣來。自慚衰且病。無以效涓埃。

寒食日三殿侍宴奉進詩一首

宛轉龍歌節。參差燕羽高。風光搖禁柳。霽色暖宮桃。春露明仙掌。晨霞照御一作日。一作錦袍。雪凝陳組練。林植聳干旄。廣樂初踰鳳。神山欲抃鼉。鳴笳朱鷺起。疊鼓紫騮一作驪。豪象舞嚴金鎧。豐歌耀寶刀。不勞孫子法。自得太公韜。原注。已上四句。奉述內樂破陣樂。分席羅元冕。行觴舉綠醪。殷中時落羽。檣末乍

升猱。瑞景開陰翳。薰風散鬱陶。天顏歡益醉。臣節勁尤高。一作罄忘勞。楛矢方來貢。雕弓已載囊。英威揚絕漠。神算盡臨洮。原注：已上四句奉述北虜款塞。西戎畏威。赤縣陽和布。蒼生雨露膏。野平惟有一作秀。麥田闢又一作久。無蒿祿秩榮三事。功勳一作勤。乏一毫。寢謀慚汲黯。秉羽貴孫敖。煥若遊元圃。歡如享太牢。輕生何以報。一作只。自比鴻毛。

李衛公會昌一品集別集卷一

黃冶賦并序 成都作

蜀道有青城峩眉山。皆隱淪所託。辛亥歲。有以鑄金術干余者。竊歎劉向累世懿德。爲漢儒宗。其所述作。根於聖道。猶愛信鴻寶。幾嬰時戮。况流俗之士。能無惑於此乎。因作賦以正之。

漢武帝遭世承平。百蠻以甯。自謂德成堯禹。功高湯武。聞升龍於鼎湖。乃甘心於斯語。有方士李少君。譎詐不誕。乘邪進取。盛稱化丹砂爲黃金。可以登青霄而輕舉。時董大夫侍側。帝曰。子知其術乎。仲舒進曰。臣惟聞天地變化。聖人鎔範。方士之言。臣以爲詔。至如圓方爲鑪。造化爲冶。鼓風爲橐。熾陽爲火。元黃之氣。細縕和粹。稟而生者。爲仁爲智。是以生寶實繁。終古不匱。天地之鎔範鼓鑄也如是。及夫堯舜之化。大道爲鑪。中和爲冶。聲教爲橐。文明爲火。以法天爲造。以得賢爲寶。是以得其鴻名。後天難老。至於仲尼無位。大莫能致。猶鑄顏與冉。底於極智。聖人之鎔鑄也。取類原注。一本有天地字。若乃不務德業。營信秘籙。祈年永久。以極嗜欲。斯則不由於正道。無益於景福。帝曰善。乃罷方士而去之。故得漢道隆盛。令名不虧。

畫桐花鳳扇賦并序 成都作

成都夾岷江。磯岸多植紫桐。每至暮春。有靈禽五色。小於元鳥。來集桐花。以飲朝露。及華落則煙飛雨散。不知其所往。有名工繪於素扇。以賁穉子。余因作小賦。書於扇上。

杳始華兮綠江曙。粲鮮葩兮泣朝露。樹煜煜兮霞舒。鳥爛爛兮星布。彼嘉桐兮貞且猗。當暮春兮發英蕤。豈鵷雛之珍族。又棲託乎瓊枝。被零露兮甘且白。涵曉月兮灑鮮澤。豈青鳥之靈儔。常飲吮乎玉液。有嘉穀而不啄。有喬松而不適。獨美露而愛桐。非人間之羽翮。遶花落而春歸。忽雨散而川寂。悵丹穴之何遠。想瑤池而已隔。爰有妙工。圖其麗容。宛宛兮若餐珠於芳藥。飄飄兮疑振羽於光風。感班姬之素扇。空皎潔兮如霰。亦有美人。增華點絢。雀伺蟬而輕驚。原注南期畫扇尤重蟬雀女乘鸞而微眄。未若繪斯禽於珍簾。動涼風於羅薦。非欲發長袂之清香。掩高歌之孤嘯。庶玉女之提攜。列崑墟之瑤宴。乃爲歌曰。青春晚兮芳節闌。敷紫華兮蔭碧湍。美斯鳥兮類鵷鸞。具體微兮容色丹。彼飛翔於霄漢。此藻繪於冰紈。雖清秋之已至。常愛玩而忘餐。

通犀帶賦并序 再至江南作

客有以通犀帶示予者。嘉其珍物。古人未有詞賦。因抒此作。蓋盡其美焉。

君子以良玉比德。豈不以溫潤而近人。惟駭鷄之至寶。亦含章而可珍。包黃中之粹色。發奇彩之彬彬。芝草繞葩而獵葉。煙霞異狀而輪囷。雖復孕元兔於月魄。隱青鸞於鏡塵。顧霄漢之悠遠。悵工人之弗真。匠者以其靈可禦邪。光能遠燭。翦截本末。發揮藻縟。砥若礪金。剗如切玉。析以爲帶。加之盛服。御之則附一作附。身。褫之則韞。似達人之卷舒。不專玩乎掌握。矧乎白璧雖美。尙不掩瑕。何茲物之無玷。豈待瑩而增華。溫兮如玉。氣舒虹。粲兮若晨光。燦霞。彼廓落之繁飾。諒無足以稱嗟。若乃名山岑寂。珍圖譎詭。柳谷

則麟馬粲然。扶風則魚龍隱起。徒有象而無施。故雖奇而莫擬。然則美服珍玩。近於禍機。虞公滅而垂棘返。壯武殘而龍劍飛。先哲所以聞象則服。防患則微。經侯委珮而去。宣子辭環以歸。

鼓吹賦并序 再至江南作

鼓吹本軒皇因出師而作。前代將相有功則假之。今藩閫皆備此樂。余往歲剖符金陵。有童子六七人皆於此藝特妙。每曲宴奏之。及再至江南。並逾弱冠。悲流年之倏忽。憶前歡而悽愴。乃爲此賦。追昔吳會之年。思爲衛霍之將。懷瀚海而發憤。想狼居而在望。厭桑濮之遺音。感簫鼓之悲壯。每聞茲樂。心焉猶尙。爰有振童。原注。出西京賦。穎秀含聰。思慮未敢。專和發中。繁會曲折。變態不窮。交籀燦電。揮手成風。或累發而碎隱。或徐弁而從容。管孤引以嘒嘒。鼓輕投而逢逢。若乃清景妍和。嘉客來萃。登高臺而互動。對芳樹而並吹。見鵬鸞之爭厲。聳壯士之憤氣。原注。鵬鸞爭壯士怒。皆鼓吹曲名。忽疑朔鴈叫於寒煙。胡沙蔽於天地。其始也。若伐木丁丁。響連青冥。喧禽萬族。聲應崖谷。其縱也。狼羊鬪角。奔兕相觸。轉石振於崩溪。燎野焚於寒竹。其終也。如風飄暫息。萬籟皆肅。天地霽而雷霆收。川波靜而魚龍伏。昔我往矣。子衿青青。我今來思。突而弁兮。諒昔人之多感。覩移柳而興悽。惜歲年之易往。歎親好之常睽。於是勉其成人。再命迭作。念所思而不見。慨悲翁之蕭索。原注。所思悲翁。並曲名。音豈殊於今昔。情自有於哀樂。乃知孔將比於鳴蛙。陸反思於唳鶴。彼衰退於憂傷。並榮華之昭灼。

白芙蓉賦并序 再至江南作